



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili

23 Feveireiru 2015

**Tribunál Distritál Dili julga úniku kazu violénsia doméstika ida liu husi julgamentu movel
iha Distritu Liquiça**

Iha 18 Feveireiru 2015, Tribunál Distritál Dili realiza julgamentu movel iha estasaun Polísia Distritu Liquiça hodi julga arguidu JdSG ne'ebé akuza komete violénsia doméstika hasoru nia feen iha Tibar, Distritu Liquiça. Depoisode julgamentu tribunál imediata konklui prosesu ne'e no kondena arguidu ho pena prizaun tinan 1 fulan 6 no suspende ba tinan 2.

Ministériu Públiku akuza katak iha 20 Maiu 2014, arguidu tuku dala rua iha lezada nia kotuk laran, basa iha hasan parte los, tuku tan dala tolu iha kotuk laran, buti iha kakorok no rasta lezada nia fuuk too lezada monu ba iha rai. Aktu ne'e rezulta lezada sofre bubu no moras iha lezada nia kotuk laran, hasan no hirus matan. Kazu ne'e akontese tanba lezada soe tiha arguidu nia arloji (*jam tangan*) wainhira lezada haruka arguidu hein sira nia oan, atu lezada fase ropa maibé arguidu lakohi.

Ministériu Públiku akuza arguidu kontra artigu 145 Kódigu Penál kona-bá krime ofensa ba integridade fízika simples konjuga ho artigu 35 Lei Kontra Violénsia Doméstika.

“Julgamentu movel nu'udar meus ida atu hakbesik justisa ba comunidade iha area rural sira, maibé JSMP rekomenda atu julgamentu hot-hotu tenke maneja ho efisiansia atu produz implikasaun ba sistema justisa”, dehan Diretor Ezekutivu JSMP, Luis de Oliveira Sampaio.

JSMP hanoin katak tuir loloos julgamentu ba kazu ida deit efisiente liu realiza iha Tribunál Dili tanba bele hamenus gastus viajen nian. Aleinde ne'e hare husi aspetu distansia JSMP hanoin katak julgamentu ne'e efisiente liu atu julga iha Dili duke Liquica, tanba distansia entre Tibar mai Dili besik no fasil liu duke ba Liquica.

Rua setubal, Colmera, Dili Timor Leste

PoBox: 275

Telefone: 3323883

info@jsmp.minihub.org

www.jsmp.tl

Facebook: www.facebook.com/timorleste.jsmp

Twitter: @JSMPtl

Iha julgamentu ne'e arguidu uza nia direitu nonok. Enkuantu lezada kontinua mantein faktus iha akuzasaun katak arguidu tuku dala 2 iha kotuk laran, basa iha hasan, tuku dala 3 iha kotuk laran no rasta lezada nia fuuk too lezada monu ba rai.

Ministériu Públiku konsidera faktus sira iha akuzasaun provadu hotu tuir depoimentu lezada nian iha tribunál no konfisaun arguidu durante inkeritu iha ministériu públiku. Bazeia ba faktu provadu ne'e, ministériu públiku husu ba tribunál atu kondena arguidu ho pena prizaun tinan 1 fulan 6 no suspende ba iha tinan 3.

Iha parte seluk, defeza husu ba tribunál atu kondena arguidu ho pena admoestasaun. Defeza haktuir katak antes julgamentu produsaun provas hahu, defeza konfirma fali ho arguidu kona-ba faktus ne'ebé ministériu públiku akuza ba nia, arguidu deklara katak nia halo duni aktu hirak ne'e hasoru lezada. Maske nune'e, arguidu deklara katak nia foin premeiraves komete krime, di'ak malu ona ho lezada no responsabiliza ba nia família.

Hafoin alegasaun, tribunál konklui kedas prosesu ne'e no kondena arguidu ho pena prizaun tinan 1 fulan 6 no suspende ba tinan 2.

Kazu ne'e rejista iha tribunál ho Nú. prosesu 1071/14. Julgamentu ne'e prejide husi juis singular Dr. José Maria de Araujo, ministériu públiku representa husi Dra. Ivonia Maria Guterres no Dr. Napoleao da Silva, arguidu hetan defeza husi Dr. José da Silva husi defensoria públiku.

Aleinde, iha loron tuir-mai, 19 Feveireiru 2015, Tribunál Distritál Dili mós julga uniku kazu ofensa integridade fizika simples ida iha Distritu Ermera.

Atu hetan informasaun kompleitu bele kontaktu:

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org
Telefone:3323883 | 77295795